



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

11. Kalenderwoche – ab 12. März 2011

Wenn de Audos redn kenndn...

De Audos sin ja heidzudaache werglisch Gombjudor off Rädor. De gesamde Deschnig is mid dor Elegdronig dährardisch vorbanzld un vorgnibbord... - du kannsd an deim Auto nischd selbor rebariern. Ooch de Wergschdadd nisch! Die dun bloß noch Baugrubbn wechsln.

Nee, wensch da an friehor denkn du, so een Drabbi, dähn konndesde werglisch bis zur ledzdn Noggnwelle ausenandornemm... sogahr dähn Vorgasor haddsch ma offgemachd un das Schwimmorvendiel, was e Loch hadde un nisch mähr schwimm wollde... - das habsch eischnbfödisch geleeded, damids widdor schwimm konnde. Un das had ooch geglabbd. Heidzudaache, bei meim Ford, da weeiß isch gahr nisch, wo dor Vorgasor is. Un ob dähr ieborhaubd noch een Vorgasor had. Das eenzsche was isch bei meim Ford selbor machn kann, is Dankn un de Scheibenwaschanlache mid Wassor offfilln. Ansoandn... - na guhd, ooch noch Lufd bei de Reefn offbumbn... abor sonsd...?

Nee, du dusd in so e Auto nisch neinguggn, wie eene Sau ins Uhrwerg, nee, die Sau dud ja wenischdens im Uhrwerg noch de Rädln sähn! Wenn isch bei meim Ford unnor de Modorhaube guggn due, da säh isch bloß noch Abdeggungen aus Blase un einische geheimnisvolle Drähde un Leidungen. Ja, in de Audos had de modernsde Deschnig Einzuch gehaldn! Wenn isch wellde, kennde isch sogahr mid meim Auto redn. Ja, da is eene drinne, die dud mid mir redn. Isch hab das abor noch nisch ausbrobierd. Das is mir irschendwie mysderiös! Die dud deine Schdimme erkenn un befolschd deine Befähle dann offs Word. Du brauchsd nisch mähr selbor de Gnöbbe am Radio drigg... die schdelld ein, was de sachn dusd. Un had eene weibliche Schdimme! Genau, das is mir

zu unwahrscheinlich - eene Frau, die offs Word heern dud?! - nee, das is zuviel dor Deschnig!
Bloß de Hube, die is noch so vorsinfludlich wie beim Drabbi. Düd, düd, dühd!

Warum ham de Audos keene diggidahle Laudschbreschoranlache?

Also, schdadds so e annonyhmes Düdüdühd wärs doch bessor, mor kennde bräziese sachn, was mor meend! Hee, du Gnallooche mid dähm blaun BMW - hier hab isch de Vorfahrd!

Da wissde dähr dann genau, dassor gemeind is. Bei Düdüdühd dud dähr sisch womeeschlich gähr nisch angeschbrochn fiehln!

Nee, mid Laudschbreschoranlache, da kenndesde manschn Vorkährsdeilnehmor middeeln, wassor grade fiehr Misd machn dud. Un was de von ihm haldn dusd: Angähbor! Idjohd!

Ooch Radfahror un Fußgängor... - die kenndn sisch eene Bfeife anbrenn! Du kenndesd dähnen gnadenlos glar machn, wasse fiehr Ar... , äh, arme Deufl sin! Ja, mid Laudschbreschoranlache däde das gehn. Wennsde bloß Fingorzeeschn gähm kannsd, weeßde ja nie, ob die ooch härguggn dun!
Abor wenn de Audos laud schbreschn kenndn... - da wär Lähm im Vorkähr!

Eduard Sachsenmeyer